



„Gæca, son boatta balvaigum, ja juokke čalbme galgga su oaidnet, maidai si guđek læk su čadarettim.“

Nr. 22. 20ad jakkegördde.

Korsfjordast 30ad november 1918.

Redaktør: Henr. Olsen.

Valde vuost ja adde dasto!

Dat čabba muittalus lœska ja su tempeladdaldaga birra doalvvo mu jurdašet dam ala, atte kristalaš ællem čiegnalemus oaiveldusast bisso dast: 1) atte valddet Ibmel giedast ja 2) atte addet Ibmel giedast.

Vuost ja manemusta: Valde Jesusa Ibmel giedast! Son læ aido Ibmela čelkkemættos addaldak migjidi (Joh. 3, 16; Jak. 1, 17), dievva armost ja duottavuodast. Ja Jesusa mielde čuovvo alme hærvasvuotta. Ja stuora sieloillo.

Ustebam, geigge du giedad olgus osko siste ja doppe Jesus, valde su Ibmel giedast ja doala su gidda osko siste, atte don ik masse su mailme slama siste. Valde Jesus Ibmel giedast evangelium siste, vielljasærvevuoda siste, rokkus siste! Valde ja æigaduša su! Vuoi man rigges don dalle!

Valde ællemburid Ibmel giedast. Dam bæivalaš laibe, mi galleta du njalme ja dakka du duttavažžan, nuft atte don doaimatak du dagod alma šuokekætta. Mutto muite atte don valdak dam buok Ibmel giedast nuftgo ansaškættes arbmoaddaldagak Jesus diti. Duttavašvuotta ja gitalus læ basse rætak du bævde alde. Dust gæst læk æmbo go „lœska addaldak“ — muite atte dat læ Ibmel giedast ja ige du ječad giedain. Læggo don valdattam gitemest? —

Valde maidai dai lossis beivid Ibmel giedast. Buocalvasa, bakčasid ja ollo gadnjaliid. Vaivašvuoda ja morraša. Valde daid Ibmel giedast ja læge dietteyaš dasa, atte dak saddijuvvujek dudnji, buorren boatem diti dudnji, vai don gæotuvvuk Jesus lusa. Moft dat bitta dadde læ vaddes oappat. Mutto dasa gutte læ oappam dam Ibmel skuvlast, maggar jedditus, illo ja fabmo, gasko buok — fabmo gitet Ibmel dam oudast mi i maiste oažžai. Ibmel læ rakisvuotta.

Adde dasto Ibmel giedast. Vuost: adde du ječad! Buok maina don læk ja æigadušak. Dat læ dat maid Ibmel vainota: du vaimo. Rakis don, adde Ibmeli du vaimo, du ællem, du jurddagid, du navcaid, du aigad, buok ječad. Ja don illodattak su sagga, don ješ fast lagjik ollo buristsivnodusa daggobokte.

Adde ječad særvegoddai. Dast læ vuoiggadvuotta dudnji. Adde ječad særvegoddai dast gost don asak ja balvval dam daina apiguim dust læk. Ibmeli lekus gitos juokkehaža oudast, gi Jesus nammi adda ječas særvegoddai ja vidnegarde-barggoi.

Doaivvo.

Dam duotta oskolažast læ hui hærvas doaivvo. Ja doaivvo læ saddo dam gæčaluvvum mielast. Rom. 5, 4.

Dat læ audogas jurddagi, atte Hærra læ asatam saje su moarsai, ja atte mist gasko buok atestusa læ doaivvo hærvasvuoda harrai Ibmel lutte.

Mu ustebam, lægo dust daggar doaivvo? Mangas ellek boasto doaivo siste. Go olmuš jærra lægo si bestujuvvum, de boatta vastadus: „Dokkoguovloi mon doaivom mannat.“

Vuoi man ollok dadde læ guđek bettik ječasek agalažat! Don galgak læt visses dam ala lækgo don bestujuvvum. Jos Jesusa varra læ ožžom eritsikkot du suddoid, don læk vuostaivalddam dam ollašuvvum lonastusa ansaškættes armost ja ožžom rafhe vaibmoi ja ilo Ibmel særvevuodast, de dust dalle læ rivtes, dat cælle doaivvo, mi i galga hæppašuttet du bajasčuozželæine iddedest.

„Don læk bæstam mu sielo jabmemest.“

(Salm. 56, 14).

Mi læimek jabmam bagjelduolbmami ja suddoi sisa, mutto Hærra bodi ja bajaslikkati min jabmin ja sisagogati dam agalaš ællem famo min vaimoidi. Dat sæmma cellem, mi læi Ibmel siste, læ dal min Jesus Kristus bokte.

Jabmem i galga vahagattet min, dastgo „dat gutte osko mu ala,“ čelkka Jesus, „i galga go assege jabmet.“

Mutto ællem galgga ellujuvvut. Maid Hærra læ addam dudnji du vaimo sisa, galgga oidnujvut du ællemest.

Æle dalle Ibmel čalmi oudast. Divte su vuoiņa doalvvot sane du ja Ibmel gaskast. Gulddal su jiena sikke go son ravve ja go son avčota.

Jos du gaidno læ devddujuvvum roggiguim ja gielaiguim, jos

vaddok njagadek du birrasin, de luote aivefal Ibmel ala, son læ famolaš du varjalet. Divte ječad čadnujuvut sudnji gidda. Jos don guossalak, de vagjola son du baldast, dorjoda du ja laidde du ællemgæino mielde gidda alme sidi.

Vanhurskesendakkujubme.

„Moft jurdašak don šaddat vanhurskesendakkujuvut Ibmel oudast?“ jærai muttomin okta irlan-dalaš nubbest.

„Mon oskom dam aivefal Jesus rakisvuoda bokte ja imge mange æra bokte,“ vastedi olmai.

„Sagga buorre,“ mutto maid oaiveldak don vanhurskesendakkujumin?“

„Dam mon mielastam cælkam dudnji. Ouddamærka diti mon savašim dakkat ovta matke. Mon manašim vuolas ruovddemadestašoni ja aigošim lavkket sisa muttom vavdnoi, mutto konduktøra orostattaši mu ja jæraši lægo must bilætta. Mon vastedifčim must i læk. „De don diedostge ik oažo mannat toga mielde,“ vastedifči son. Mutto okta usteb must čužoši dalle mu baldast ja falaši oastet munji bilæta. Mon ožušim dam sust ja čajetifčim dam konduktøri. Dal i lifči mikkege hettitussan. Mon jodašim fria, mutto nubbe olbma bilæta bokte.

Nuft aigom mon juksat alme Kristusa vanhurskesvuoda bokte. Must i læk aldam mikkege; dat mi læžža, læ duolvas ja billašuvvam: dat i dokke manenge. Jesus jami mu oudast; son addi munji ječas vanhurskesvuoda, ja dam sist satam mon bissot Ibmel oudast. Mon im sate maidege æra čajetet alme poarta oudast go Jesus vanhurskesvuoda.“

Igo dat læm buorre vastadus? Maggar vanhurskesvuodain aigok don ouddanloaidastet, go logodak-kambæivve boatta?

Vuttivalde dam!

Daggobokte atte olmuš dabma ječas njuokčam, oappa son bagjel-raddit ječas miela.

Dat doavkke šladdarda, læ doattalmættes ja sloaparda ollo saniguim; son rabmo daina atte læ

sattam addet dam manemuš sane ja dakkam vuostalaste javotæbmen. Son čævlastalla iloin bagjel ječas jallavuoda, læ alo bæloštægje dilest ječas harrai ja skittarda nuft navcaides.

Dat jiermalaš vælttada ječas erit bagjelmæralaš ollo sanin, šlad-darest, doattalmættemest ja ječas bæloštæmest. Dat i daga sudnji maidege, jos son orro rottemen dam oanekemus bocce; son illoda go son fertte dovdastet ječas læt vuoitatallam; dastgo son dietta atte go son læ gavdnam ja eritraidnim mæddadusa aldestes, læ son šaddam nuft ollo jiermalebbo.

Buristsivdnevuvum læ son gi i hapotala oažžot dam manemuš sane.

Manalaš osko.

Go muttom ucca gandaš, gutte læi sægga buocce, dovdai atte jabmem lakkanišgođi, de celki son: »Dal, rakis Ibmel, valde don mu lusad sidi. Gæča du girjestad, de don gavnak dam siste mu nama; mu namma læ Fredrik Wilhelm Andersen. Amen.«



Du stuoremus vaddo.

(Joh. 12, 34–42).

»Vagjoleket dam boddo go dist læ čuovgga, amas sævdnjad gaččat din bagjeli.«

Odne læ Jesusest okta duodas sadne dudnji, don gi alo maŋedak du jorggalusad, juokke gærde go don dovdak goččom. Jesus datto sarnodet duina dam stuora vaddo birra dast atte ællet jorggalusa taga. Daidda læt fakkistak jabmemest don ænenusat balak. Dat hette du jorggalæmest, igo nuft? Jesus cælkka dudnji odne atte dat vaddo i læk dat stuoremus; dastgo fakka jabmemest satta Ibmel du varjalet. Son mæred juo dam boddo go don galgak jabmet, ja son læ ješ du usteb dam ašest. Mutto dat læ vaddo maid i vela Ibmel oro sattemen varjalet dust erit. Buoššodæbmen gočod bibal dam. Dat læ dat jaskades,

uccanaža ja uccanaža lakai dugjobjubme du sielo ala, atte don oainak čuovga alma jorggaltaga dasa — gulak Jesus jiena alma čuovodedin su.

Buoššodæbme læ dat atte don dagak ječad garasen du fuobmašæme vuostai, ikge čuovo dam.

Dam lakai massa olmuš sattem diti čuovvot ječas dovddoifuobmašæme, dasto massa famo æigaduššat dovddoifuobmašæme čuovvom diti ječas siskaldas jiena mielde.

Go dat čuolbma læ šaddam, de læ buoššodæbme buoredatte taga — dalle čnožžo vela dat buokvægalaš Ibmel gaskaomi taga sattem diti væketet.

Manne læk don ain jorggalusa taga odne? Ikgo don læk fuobmašam dat læ riehta atte jorggallet? Ja don muitak ollo gerdid go dat læi nuft baggolaš dudnji dam dakkat. Mutto manne dadde i šaddam? Dainago alo læi juoga gæino oudast mi dagai atte don ik čuvvum du dovddoifuobmašæme. Manne don ik daga jorggalusa odne? Jurdaš dam! I dat læk ollo mi doalla du ruoktot, mutto dat uccanaš læ galle hettit du. Ja juokke gærde go don divtak orrot jorggalusa taga, šadda dat gæppaseobo maŋedet dam.

Dat læ Ibmel vuoiŋa mi dugjo dovddoifuobmašæme min siste — su dakko læ atte dovddoifuobmašattet. Mutto dat læ min ašše atte valljit jogo mi dattop čuovvot min dovddoifuobmašæme daihe ap, ja dat valljijubme šadda vaddasebbo juokke gærde go mi æp čuovo dam dovddoifuobmašæme, maid vuoiŋa adda. Damditi i šadda goassege gæppasebbo dudnji valljit go dal.

Mutto igo dat læk ila maŋed? jærak don. Imgo mon læk juo buoššoduvvum? I, du ballo dasa čajet atte ain læ aigge jorggallet. Mutto ale divte dam šaddat odda gæččalussan dudnji maŋedam diti.

Dæiva du Ibmelad oktonassi ja namat sudnji moft don læk lage-dam ječad ja bivde sust andagassi buok du suddoid. Loga dasto Luk. 15, 20—24. Dast oainak don moft Ibmel vuostaivaldda daggarid go don.

Sardnedægje N. O p d a h l.

* * *

Lagesvuonast.

Hr. redaktor!

Bivdam »Nuorttanastai« saje dam moadde sargastakki. Im mon læk læmas imge galga šaddat mikkege avisčallid. Mutto daddeke aigom vebaš muittalet dam nuftgočoduvvum span-skadavda birra, maid gal juo dittek ædnagak ouddalgo mon muittalam. Mutto æi daddeke æra sajin buokak, moft dabe læ min guovlost daihe min gieldest.

Dabe nuftgo æra sajinge læ dat davdda hærjedam issoras lakai. Gasko oktober, go dat algi su duojes ja dam ragjai galggek læt min suokkanest jabmam arvo mielde 40 olbm, ænaš gaska-ægest, 30—50 jakkai, soames manna, 2—3 boares olbm.

Manga dalo læ avddem baccam. Værramusat læ dat oappaladdam Stuoravuona ja væstæbe Stivljenjarga ragjai. Dobbe læ 2 dalo aibas avddem, 2 olbm goabbege dalost læiga, ædne barnines. Mutto fast guovte æra dalost bacce dušše smava manak, nubbest anke akko golmain manain. Ovtæ æra dalost bacce dušše guokte boares olbm, agja ja akko. Ja ain ollo æra daloin læ baccam dušše akka-ravkke smavamanaguim boadnjas maŋŋai.

Ja nuft matta juokkehaš arvvedet moft ja maggar olbmui dille dalle šadda; dat i læk pænain ige njalmin muittalæmest, go hætte ja moraš baldalagai dakkaba sodno duojesga ænam assi lutte.

Mutto nuft dat læ oaidnam buorren dat buokvægalaš Ibmel, go son su vanhurskesvuodastes læ diktam su risses boattet ænam assi bagjeli cuiggittussan ja varritussan su olbmuidasas, sigjidi gudek vela læk dabe ædnamest, gæid son i læk vela rottim erit dabe su hærvvasvuottasis.

Mutto nubbe bælest læ son diktam dam su bagadægje risses boattet olbmui manai bagjeli rangastussan suddo hirbmadlaš guavvevuoda ja fastevuoda diti. Man gukka galgga su ačalaš vaibmo gierddat oaidnet, go olbmuk, gæid son læi sivdnedam divrasemus sivdnadussan su ječas gova mielde, læ massam ja billedam dam čabba gova suddo ællem bokte, ja nuft obba rumaš buok su lattoiguim bigjujuvvum suddo balvvalussi ja satan šlavavuoda vuollai, ja nuft læk bagjelgæčam

armo aige ærbmobeivi siste. Ige læk doattaluvvum, go Ibmel bovddimjedna læ čuogjam sin beljidi, mutto læk buoššodam sin vaimoidæsek higjededin Ibmel fallujuvvum armo, bagjelduolbmam rafhe evangelium, bilkkededin sin gudek Ibmel sane viggek sardnedet.

I læk ovdolaš, jos rangastus suddo diti boatta, maid basse Judas čalla su girjestes 15. vørsast: »Doallam diti dnomo buokai bagjel ja rangastam diti buok ibmelmættomid sin gaskast buok sin ibmelmættom dagoi diti, maid si læk dakkam, ja buok dai garra sani diti, maid si læk sardnom su vuostai, dak ibmelmættom suddolažak.»

Skogvikast 18. novbr. 1918.

Ole Olsen.

Ibmel bilkkedæbme.

Obba soađe algo rajest læ dak fillijægjek Tuiskaædnamest oktan sin kæisarin čuorvodallam atte Ibmel læi sin boellasaš.

Ibmel basse nammi læ si sisahakim dam vigetes Belgiai, boalddam gavpugid, bæčam sivil-olbmuid vuolas givsedam ja goddam nissonid ja manaid, ja dakkam ædnag æra ibmelmættom mænodosaid. Ja dam sæmma basse nammi læ vuolasduolbinam Serbien, Montenegro ja Rumænien.

Ja ain dam sæmma Ibmel nammi ovtastatte ječasek bolsjevikeriguim dam surgadlaš doaimatussi ruoša albmuga vuostai.

Aivestassi Ibmel nammi algategje čacevuolesoađe sin vašalažai vuostai, nuftgo nœtrala gavppejotte čampai vuostai ja buccijoditægje skipai bæčebodnai.

Ja ædnag æra surgadlaš dagoid ollo vigetes olbmui vuostai, ja buok aive Ibmel nammi.

Velguson læ stuoreb ibmelbikkadus dakkujuvvum dam mailmest, go olles boergalaga balvvalus læ jorggaluvvum Ibmel nammi?

(Čalla okta daro blađe)

Sisasaddi »Nuorttanastai« K. H.

Suite vebaš moftidusa raddest, ja ale læge apetæbme ja argge ællemvaddoin. Ællem læ soađaidallam juokkehažzi; dat læ gillamuš ja gæčalušak juokkehažzi. Guodde daid, bajed daid, bolto čađa alma vaidekætta.

(Carlyle).

Dam vides mailmest.

Præsident Wilson

læ boattemen Europai radđadallam diti dai alliertai oavvamužaiguim rafheollašattujume.

Dat odđa stuoradigge.

Dam odđa stuoradiggai læ valljuvvum 55 venstre, 49 høire ja 18 socialista, dasto njæljes, gudek čei gula guđege erinoamaš partiai.

Sameædnam gavpugin šaddai skuvlaoudastčuožžo Karl Ivarsson Vargain valljuvvut stuoradiggeolmajen.

Mailme davemus avisa

læ daina beivin alggam olgusboattet Spitsbergast. Dat læ socialistblađe, namma læ »Solidaritet«, ja olgusdoaimatuvvu 1 gærde vakkost.

Norga tapa soađe vuolde.

864 dampa læ Norga massam soađe vuolde. 1120 olbm læ sorbmijuvvum.

Dat læ stuora ja bavčagatte tapak dam ucca našoni, ja ige sattet namatet morraš ja occalæine sin lutte gæk nuft læ massam sin rakkasid.

Dat bæggotuvvu atte dak alliertak aiggok gaibbedet Tuisklandast atte dat galgga balkašet Norgi dam hirmos vahaga.

Kæisar Wilhelm

maŋemuš sanek, go son fertti guoddet su alla ammates, legje: »Vare mu eritloaidastæbme gartaši buoremussan Tuisklandi.« Son læ valddam orromsaje Hollandi; mutto gulastuvvu atte dak alliertak galggek gaibbedet oazžot su fanggan ječasek valde vuolai.

Hættečuooryvom Tuisklandast.

Æmbo ja æmbo itta bæive ouddi, man dorvotes dille Tuisklandast læ ælatusa dařhost. Dat odđa albmugradđitus læ saddim adnomčuooryvas Wilsoni, atte dat sarnota su alliertaid čajetet Tuisklandi vaibmolædesvuoda. Ja gal dat darbašuvvu, nuft surgadlaš go dille læ dobbe. Erinoamaš hæde gillajek apetes nissonak ja njammemænak, gœi gaskast jamolašvuotta læ stuoremus.

Mais- ja nisojafok.

London bokte muittaluvvu, atte dak alliertak aiggok diktet fievreduvut Norgi 50,000 tons maisjafoid. Dal rađđadallujuvvu oazžom diti sisafievreduvvut maidai 50,000 tons nisojafoid.

Manga darolaš galvvosuvddemdampa læ æskabali boattam sikke Amerikast ja Australiast, mieldebuvtededin buristdarbašatte galvoid min ædnami, erinoamaš gornid.

Salledstangim Altast.

Gasko dam mano læ stanggijuvvum Čoalmest (Rognsund), Altast arvo mielde 12--15,000 mitto čabba buoides salledak. Hadde 12—20 kr. mittost.

Boccuid lassanæbme Alaskast.

Guokteloge jage gæcest dastouddal sadijjuvvejge Sameædnarest bagjel Troandem Alaskai boccuk. Dal læ dat ucca čorragas lassanam daggar stuora ællon, atte dai lokko læ ollim 200,000 ragjai.

Dat læ nuft burist gannatam fievredet boccuid Sameædnarest Alaskai.

Stuora salledvuoddem Tuisklandi.

Tuisklanda læ dattom oazžot oastet Norgast 455,000 farppal salledid, mak gartek 30—40 miljon kruvna ouddi.

Dak alliertak galggek læt miettast diktet dai salledid olgusfievreduvvut Tuisklandi.

Spanskadavdda.

Spanskadavdda Sameædnarest orro ain læme garranakalaš soames sajin.

Gilevuona guovloin Lagesvuonast galgga dat bahas davdda fast alggam hærjedet. Manga olbmui læ jabmam.

Goakgiedde gieldest læ jabmam 40 olbmui oktober manost.

Maidai dam ucca Garašjogast læ jabmam 20 olbmui.

Gonagaslaš likkosavaldak.

Gonagas Haakon læ saddim likkosavaldak-telegrama Belgien gonagassi, go dat læ fast ožžom boattet ječas ædnami, mi dal vanhurskesvuoda vuitujume bokte læ frijandakkujuvvumen.

Davvesida provianteringraada

bušeta rekinastem dam 31. oktober dam jage čajeta atte raadast læ 7000 kruvna buorren daihe ligas.

Soatte-loapa likkatusak.**Tuisklandast læ ain rafhetes dilek.**

Dilalašvuodai harrai Tuisklandast læ vaddes dakkat rivtes oaiveldusa. Ovtta gaska dat orro čuvgodæme daihe jaskodæme, mutto nubbe boddost læ fast nuft ollo verrab.

Davve-Tuisklanda læ dakkam ječas republikkan. Hamburg oaivvegavpug. Gaskal Mada- ja Davve-Tuisklanda læ vašše attanuššamen. Bolsjevisma orro vidanæme baladatte lakai dobbe.

Vuoittohærraid valdašæbme.

Franskaolbinak læ juo ruoktotvaldan Elsass-Lothringen. Illo diedostge stuores Frankrikast.

Dak alliertak matkuštekk dassedet Tuisklanda sisa, læ juo lakkanæmen Rhinen-dednoi.

Tuiska soatteskipak læ nuolatuvvumen Englanda kommando vuolde. Muttom oasse daina tuiska mæravuolevadnasin læ juo dolvvujuvvumen Englandi.

Ođđa soattehoabma.

Illo læ mailmesoatte orostam, oudalگو fast bæggotuvvu gazodæbme.

Nuft læ Davve-Ruošædnarest dak garranakalaš bolsjevikalazak falletam dai alliertaid, mutto si læk ruoktotdævččomen vuostalastid stuora tapan daidi.

Ja Ungarnest læ tsjeker-olmuščærdda alggam mobiliserit ungarnalazai vuostai. Nuft maidai madašlavalaš olmuščærdda Italien vuostai.

Mada-Ruošædnarest læ dai alliertai famok jottemen oudast havkkadam diti bolsjevik-raddimlage ja nuft oazžot gagjot Ruošædnam friavuoda.

Belgien stuora bæivve.

Dam 22 novbr. læi Belgien stuora historialaš bæivve. Gonagas Albert festalaš sisaloaidastæbme Belgien oaivvegavpugi dollujuvvui dam bæive.

Avvo obba mietta mailme stuores. Kristianiast legje plævgak gessujuvvum staggoidi.

Soattefangaid ruoktotboatem.

Dai alliertai soattefangak Tuisklandast læ matkuštæme sidi vanhæmædnamidi. Dai čuđiduhatid vagjolus golgga dego garra famolaš ravdnje rasta dam tuiska raje.

Mutto stuora oasse daina ruoktotmacce fangain læ gillam ollo hæde nælge ja hærjos divšo dafhost Tuisklandast. Ollok læk jabmam vuomešvuodast matke alde. Englanda læ aittemen orostattet galvvofievredæme Tuisklandi dam ašest.

Jabmem-diedetusak.

Daggobokte diedetuvvu fulkidi ja ustebidi, atte mu rakis, divras boadnja ja bardne, min rakis ačče ja viellja

Josef Johannesen

jami 36 jage boaresen, osko siste su bæstes ala oanekis buocalvasa vuolde.

Garašjogast 2—11—18.

Gunhild Johannesen,
r. Hansen. Marit Johannesen,
ædne, r. Lindå.

Vieljak ja oabak.

Marit, Hans Johannes,
Marie Elisabeth, Anna Berit.
manak.

Min rakis nieidda ja oabba

Marit

oaddai jabmem bokte osko siste su Hærras illoi 25 jage boaresen.

Garašjogast 5—11—18.

Ragna ja Per Samuelson,
vanhemak.

Per, Johannes, Klemet,
vieljak.

Berit, Kirsten Ragnhild,
Anna Elisabeth,
oabak.

*

»Nuftgo mi læp adnam dam ænanilaš olbmui gova, nuft galggap mi maidai adnet dam almalaš olbmui gova. Dat nokkavaš berre garvvodet nokkamættomvuoda ja dat jamolaš berre garvvodet jabmemættomvuoda; mutto go dat nokkavaš garvotuvvu nokkamættomvuodain ja dat jamolaš garvotuvvu jabmemættomvuodain, de ollašuvvu dat sadne, mi læ čallujuvvum: Jabmem læ njillujuvvum vuoitto. Jabmem, gost læ du sæčagas? Helvet, gost læ du vuoitto? Mutto Ibmele lekus gitos, gutte adda migjidi vuoitto min Hærramek Jesus Kristus bokte.» 1 Kor. 15, 49—57.

Dat læ min losis noadde diedetet vieljaidi ja oabaidi atte atte Hærra balvvalægje

sardeolmai John Andersen Bevkop læ oadđan jabmemi dam 7. novbr. duodai oskostat Jesus salli. Son ouddal jabmem gulai vuoinqast engeli lavllont.

Vare ædnagak daggar duodaštusain vagjolifče erit dam moraslægest.

Son ješ læ ravvim dai ollo smava manaid Hærra halddoi ja savvam likko leski.

Gukka ellus su mitto! Duodai sust læ dal gudne kruvno, ige læk jabmam, mutto ælla.

Ibmel manak, illodeket juokkehaža harrai, gutte buorre duodaštusain eritvagjola dam bahas mailmest.

K.